

ZAKON

O SUKOBU INTERESA U INSTITUCIJAMA VLASTI BOSNE I HERCEGOVINE

("Sl. glasnik BiH", br. 13/2002, 14/2003 - ispr, 16/2002, 14/2003 - ispr, 12/2004, 63/2008, 18/2012, 87/2013 i 41/2016)

Prvo poglavlje - Sukob interesa

Član 1

Opšte odredbe

1. S ciljem sprečavanja sukoba interesa ovim zakonom uređuju se posebne obaveze izabranih zvaničnika, nosilaca izvršnih funkcija i savjetnika u institucijama vlasti Bosne i Hercegovine u obavljanju funkcije.
2. Sukob interesa postoji u situacijama u kojima izabrani zvaničnici, nosioci izvršnih funkcija i savjetnici imaju privatni interes koji utiče ili može uticati na zakonitost, otvorenost, objektivnost i nepristranost u obavljanju javnih funkcija.

Član 2

Principi djelovanja

1. Izabrani zvaničnici, nosioci izvršnih funkcija i savjetnici u obavljanju javnih funkcija moraju postupati zakonito, djelotvorno, nepristrasno, časno, te se pridržavati principa odgovornosti, poštenja, savjesnosti, otvorenosti i vjerodostojnosti.
2. Izabrani zvaničnici, nosioci izvršnih funkcija i savjetnici lično su odgovorni za svoje djelovanje u obavljanju javnih funkcija na koje su imenovani, odnosno izabrani, i politički su odgovorni prema tijelu ili građanima koji su ih imenovali ili izabrali.
3. Izabrani zvaničnici, nosioci izvršnih funkcija i savjetnici koji obavljaju javne funkcije treba da se ponašaju savjesno i odgovorno, da ne ugrožavaju povjerenje i pouzdanje građana, te da poštuju zakonske i druge propise kojima se određuju prava, obaveze i odgovornosti u obavljanju javnih funkcija.
4. U obavljanju javne funkcije izabrani zvaničnici, nosioci izvršnih funkcija i savjetnici moraju se pridržavati etike poziva i funkcije koju obavljaju.
5. U obavljanju javne funkcije izabrani zvaničnici, nosioci izvršnih funkcija i savjetnici ne smiju svoj privatni interes stavljati iznad javnog interesa.
6. Izabrani zvaničnici, nosioci izvršnih funkcija i savjetnici ne smiju koristiti javnu funkciju za ličnu dobit lica koja je s njima povezana. Izabrani zvaničnici, nosioci izvršne funkcije i savjetnici ne smiju biti ni u kakvom odnosu ovisnosti prema licima koje bi mogle uticati na njihovu objektivnost.
7. Izabrani zvaničnici, nosioci izvršnih funkcija i savjetnici kao javna lica moraju djelovati u interesu građana.
8. U obavljanju funkcija izabrani zvaničnici, nosioci izvršnih funkcija i savjetnici obavezni su imovinu, sredstva za rad i finansijska sredstva koja su im povjerena koristiti isključivo u svrhu za koja su namjenjena i na djelotvoran način.
9. Izabrani zvaničnici, nosioci izvršne funkcije i savjetnici u vrijeme obavljanja javne funkcije primaju platu i naknade za funkciju koju obavljaju u skladu sa zakonskim propisima o platama i naknadama zaposlenih u institucijama Bosne i Hercegovine i drugim propisima.

Član 3

Definicije

1. U smislu ovog zakona o sukobu interesa:
 - a) "**ovlaštenim licem**" smatra se lice koje je osnivačkim aktom ili Statutom preduzeća ovlašteno da predstavlja i zastupa preduzeće. Pod ovlaštenim licem takođe se podrazumijeva i poduzetnik, odnosno fizičko lice koje samostalno na tržištu obavlja djelatnosti radi sticanja dobiti;
 - b) "**srodnici**" su bliski srodnici, srodnici u pravoj liniji, srodnici u pobočnoj liniji do trećeg stepena, srodnici po tazbini do drugog stepena i dijete bračnog druga;"
 - c) "**bliskim srodnikom**" smatraju se bračni i vanbračni drug, dijete, majka, otac, usvojitelj, usvojenik izabranog zvaničnika, nosioca izvršne funkcije i savjetnika;

d) "**interesno povezano lice**" podrazumijeva srodnika ili lice koje je sa izabranim zvaničnikom, nosiocem izvršne funkcije i savjetnikom u ličnoj, političkoj, ekonomskoj ili drugoj vezi koja bi mogla uticati na objektivnost u radu izabranog zvaničnika, nosioca izvršne funkcije i savjetnika;

e) "**izabranim zvaničnicima**" smatraju se:

- članovi Predsjedništva Bosne i Hercegovine;

- poslanici Predstavničkog doma i delegati u Domu naroda Parlamentarne skupštine Bosne i Hercegovine (u daljem tekstu: BiH);

- izabrani i imenovani zvaničnici od strane Predsjedništva Bosne i Hercegovine (u daljnjem tekstu: Predsjedništvo BiH), domova Parlamentarne skupštine Bosne i Hercegovine ili Parlamentarne skupštine Bosne i Hercegovine (u daljnjem tekstu: Parlamentarna skupština BiH) i Savjet ministara BiH, a koji nisu obuhvaćeni Zakonom o državnoj službi u institucijama Bosne i Hercegovine, odnosno za čiji je izbor ili imenovanje saglasnost dalo Predsjedništvo BiH, domovi Parlamentarne skupštine BiH ili Parlamentarna skupština BiH i Savjet ministara BiH;

f) "**nosiocima izvršnih funkcija**" smatraju se ministri i zamjenici ministara u Savjetu ministara BiH;

- direktori i zamjenici direktora organa državne uprave, agencija, direkcija, zavoda, ustanova i drugih institucija Bosne i Hercegovine koji su izabrani i imenovani od Predsjedništva BiH, domova Parlamentarne skupštine BiH ili Parlamentarne skupštine BiH i Savjeta ministara BiH, a koji nisu obuhvaćeni Zakonom o državnoj službi u institucijama Bosne i Hercegovine, odnosno za čiji je izbor ili imenovanje saglasnost dalo Predsjedništvo BiH, domovi Parlamentarne skupštine BiH ili Parlamentarna skupština BiH i Savjet ministara BiH;

g) "**savjetnicima**" smatraju se savjetnici izabranim zvaničnicima i nosiocima izvršnih funkcija kako je utvrđeno Zakonom o državnoj službi u institucijama Bosne i Hercegovine;

h) "**ulaganje kapitala**" je ulaganje novca, stvari i prava u vlasničku strukturu preduzeća;

i) "**finansijski interes**" znači:

1. svaki interes kojim se izabranom zvaničniku, nosiocu izvršne funkcije ili savjetniku omogućava da primi novac u vrijednosti većoj od 1.000 KM godišnje, kao i

2. svaki vlasnički interes koji ima izabrani zvaničnik, nosilac izvršne funkcije ili savjetnik, koji odgovara vrijednosti od najmanje 10.000 KM u nekom preduzeću, društvu sa neograničenom odgovornošću, komanditnom društvu, dioničarskom društvu ili društvu sa ograničenom odgovornošću.

j) "**poklon**" znači svaku isplatu, djelovanje, uslugu, ili predmet od vrijednosti učinjene neposredno primaocu, bez naknade ili očekivanja naknade. Pokloni primljeni od bliskog srodnika, kao i pokloni čija vrijednost ne prelazi 200 KM nisu obuhvaćeni ovim zakonom.

k) "**privatno preduzeće**" označava svako zakonom utvrđeno preduzeće koje nije javno preduzeće definisano u daljem tekstu;

l) "**javno preduzeće**" je preduzeće kako je to definisano zakonima o javnim preduzećima;

m) "**javna funkcija**" podrazumijeva poslove izabranog zvaničnika, nosioca izvršne funkcije i savjetnika koji proizlaze iz funkcije koju obavlja;

n) "**vlade**" podrazumijevaju: Savjet ministara BiH, Vladu Federacije BiH, Vladu Republike Srpske, Vladu Brčko Distrikta BiH, vlade kantona, gradonačelnike i načelnike opština koji su ovlašćeni da raspolažu novčanim sredstvima, imovinom i pravima;

o) "**lična usluga**" je svako djelovanje kojim se jedna strana obavezuje da obavi određeni posao, a druga da joj plati za to određenu naknadu, a koji ne proizlazi iz radnog odnosa i

p) "**institucije Bosne i Hercegovine**" podrazumijevaju sve institucije Bosne i Hercegovine koje su osnovane Ustavom i zakonom Bosne i Hercegovine."

Član 4

1. Članstvo u upravnom odboru, nadzornom odboru, skupštini, upravi ili menadžmentu, ili u svojstvu ovlaštenog lica u javnom preduzeću nespojivo je sa javnim funkcijama izbornog zvaničnika ili nosioca izvršne funkcije.

2. Članstvo u upravnom ili nadzornom odboru, ili obavljaju dužnosti direktora direkcije, ili dužnost direktora Agencije za privatizaciju nespojivi su sa javnim dužnostima izabranog zvaničnika, nosioca izvršne funkcije ili savjetnika.

3. Angažman u privatnom preduzeću, u uslovima u kojima se stvara sukob interesa, nespojiv je sa javnim funkcijama izabranog zvaničnika, nosioca izvršne funkcije ili savjetnika.

4. Izabrani zvaničnici, nosioci izvršnih funkcija i savjetnici moraju podnijeti ostavku na svaku od nespojivih funkcija i poslova najkasnije u roku od tri dana nakon preuzimanja javne funkcije.

Član 5

Javna preduzeća i agencije za privatizaciju

1. Izabrani zvaničnici, nosioci izvršnih funkcija i savjetnici za vrijeme obavljanja javne funkcije i šest mjeseci nakon prestanka obavljanja te funkcije, ne mogu biti članovi, upravnog odbora, nadzornog odbora, skupštine, uprave ili menadžmenta, niti biti u svojstvu ovlaštenog lica u javnom preduzeću.
2. Izabrani zvaničnici, nosioci izvršnih dužnosti i savjetnici, za vrijeme obavljanja javne funkcije i šest mjeseci nakon prestanka obavljanja te funkcije, ne mogu biti članovi upravnog ili nadzornog odbora, niti direktori direkcije ili direkcije, Agencije za privatizaciju.

Član 6

Vladina ulaganja u privatna preduzeća

1. Izabrani zvaničnici, nosioci izvršnih funkcija i savjetnici ne mogu biti članovi skupštine, nadzornog odbora, uprave ili menadžmenta, niti biti u svojstvu ovlaštenog lica svakog privatnog preduzeća u koje je organ vlasti, čiji je član izabrani zvaničnik, nosilac izvršne funkcije ili savjetnik, ulagao kapital u periodu od četiri godine prije preuzimanja funkcije i za vrijeme obavljanja funkcije izabranog zvaničnika, nosioca izvršne funkcije ili savjetnika.
2. Izabrani zvaničnici, nosioci izvršnih funkcija i savjetnici ne mogu biti članovi skupštine, nadzornog odbora, uprave ili menadžmenta, niti biti u svojstvu ovlaštenog lica bilo kojeg privatnog preduzeća koje sklapa ugovore, ili na drugi način posluje, s institucijama koje se finansiraju iz budžeta na bilo kojem nivou. Ova odredba primjenjuje se samo na privatna preduzeća koja su sklopila ugovor ili posluju s institucijama koje se finansiraju iz budžeta, dok je izabrani zvaničnik, nosilac izvršne funkcije ili savjetnik vršio funkciju i to samo onda kada je vrijednost ugovora ili posla sa Vladom veća od 5.000 KM godišnje.

Član 6a

Članstvo u skupštinama preduzeća

Članovima skupštine u smislu odredaba člana 4. stav (1), člana 5. stav (1) i člana 6. stav (2) ovog zakona smatraju se dioničari koji su vlasnici više od 1% kapitala preduzeća.

Član 7

Zabrana djelovanja u slučaju sukoba interesa

1. Izabrani zvaničnici i nosioci izvršnih funkcija ne mogu glasati po bilo kojem od pitanja koje se direktno tiče privatnog preduzeća u kojem taj izabrani zvaničnik, nosilac izvršne funkcije ili interesno povezana lica imaju finansijski interes. Izabrani zvaničnici i nosioci izvršne funkcije koji se nađu u takvim situacijama uzdržaće se od glasanja, te na otvorenoj sjednici objasniti razloge zbog kojih su uzdržani.
2. Nosioci izvršnih funkcija i savjetnici neće preduzimati nikakve službene radnje koje bi mogle direktno uticati na privatno preduzeće u kojem nosilac izvršne funkcije ili savjetnik, ili interesno povezana lica imaju finansijski interes. Nosioci izvršnih funkcija i savjetnici će u takvim situacijama prosljediti donošenje odluke o poduzimanju radnje drugom nadležnom tijelu i pismeno navesti razloge za takvo prosljedivanje.
3. U slučaju da izabrani zvaničnik, nosilac izvršnih funkcija ili savjetnik prekrši odredbe ovog člana, glas ili odluka zvaničnika ili nosioca izvršnih funkcija smatraće se ništavnim.

Član 8

Ugovori o ličnim uslugama

1. Izabrani zvaničnici, nosioci izvršnih funkcija i savjetnici ne mogu sklapati ugovore o pružanju ličnih usluga sa bilo kojim javnim preduzećem.
2. Izabrani zvaničnici, nosioci izvršnih funkcija i savjetnici ne mogu sklapati ugovore o pružanju ličnih usluga sa bilo kojim privatnim preduzećem koje sklapa ugovore, ili na drugi način posluje sa vladama na bilo kojem nivou. Ova odredba se samo primjenjuje na privatna preduzeća koja su sklopila ugovor ili posluju s Vladom istovremeno dok izabrani zvaničnik, nosilac izvršne funkcije ili savjetnik vrši funkciju i samo onda kada vrijednost ugovora ili posla s Vladom prelazi 5.000 KM godišnje.
3. U slučaju da izabrani zvaničnik, nosilac funkcije ili savjetnik prekrši odredbe ovog člana, ugovor zvaničnika ili nosioca funkcije smatraće se ništavnim.

Član 8a

Angažman bliskih srodnika

Pod uslovima definisanim u čl. 4, 5, 6. i 8. ovog zakona, angažman bliskih srodnika izabranog zvaničnika, nosioca izvršne funkcije i savjetnika takođe dovodi do situacije u kojoj za ovog izabranog zvaničnika, nosioca izvršne funkcije i savjetnika dolazi do sukoba interesa.

Član 9

Zabranjene aktivnosti

Osim ako je to izričito propisano odredbama ovoga zakona, izabranom zvaničniku, nosiocu izvršne funkcije i savjetniku se zabranjuje, da:

- a) prime ili zahtijevaju poklon ili drugu korist ili obećanje poklona ili druge koristi radi obavljanja javnih funkcija;
- b) prime dodatnu naknadu za poslove vršenja javnih funkcija mimo zakonskih propisa o platama i naknadama zaposlenih u institucijama Bosne i Hercegovine i drugih propisa;
- c) traže, prihvate ili prime vrijednost ili uslugu radi glasanja o bilo kojoj stvari ili uticati na odluku nekog tijela ili lica;
- d) obećavaju zaposlenje ili neko drugo pravo u zamjenu za poklon ili obećanje poklona;
- e) privilegovati lica radi stranačkog ili drugog opredjeljenja ili radi porijekla, ličnih ili porodičnih veza;
- f) odbiju uvid u svoje finansijsko poslovanje;
- g) utiču na dobivanje poslova ili narudžbi države u cilju sticanja materijalne ili nematerijalne koristi za sebe ili za drugoga;
- h) koriste radi lične dobiti ili dobiti interesno povezanih lica i povlaštene informacije o radu državnih tijela;
- i) na drugi način koriste svoj položaj kako bi uticali na zakonodavne, izvršne ili sudske vlasti te tako ostvarili ličnu dobit ili dobit interesno povezanih lica, neku povlasticu ili pravo, sklopili pravni posao ili na drugi način interesno pogodovali sebi ili drugom interesno povezanom licu.

Član 10

Primanje poklona

1. Poklonom u smislu ovoga zakona smatra se poklon u vezi s obavljanjem funkcije, a podrazumijeva: stvari, prava, usluge bez naknade te neku drugu korist datu ili obećanu izabranom zvaničniku, nosiocu izvršne funkcije i savjetniku, npr: ugostiteljsku uslugu, uslugu noćenja, oprost duga ili obaveze, putni trošak ili slična usluga, ulaznica, umjetnički predmet, suvenir, osiguranje ili slična usluga, medicinska ili slična usluga koju zvaničnik nije lično platio prema tržišnoj cijeni.
2. Poklon u vrijednosti do 200,00 KM izabrani zvaničnici, nosioci izvršne funkcije i savjetnici mogu zadržati i ne trebaju ga prijaviti.
3. Poklonom u smislu stava 2. ovoga člana smatra se i više poklona poklonjenih od strane istog lica u razdoblju od jedne godine.
4. Poklone iznad vrijednosti iz stava 2. ovog člana izabrani zvaničnici, nosioci izvršne funkcije i savjetnici ne smiju zadržati, već su ih obavezni prijaviti i predati instituciji vlasti koje su ih izabrale, ili imenovale i u čije ime obavljaju povjerenu javnu funkciju. Institucije su dužne da u roku od 30 dana od dana stupanja na snagu ovog zakona posebnim aktom propišu postupak, način evidentiranja, predaje i čuvanja primljenih poklona. Institucije su dužne da informaciju o predatim poklonima dostave Komisija za odlučivanje o sukobu interesa u roku od 15 dana od dana sačinjavanja informacije. Centralna izborna komisija BiH dužna je da uspostavi centralni registar poklona koje su izabrani zvaničnici, nosioci izvršne funkcije ili savjetnici primili u obavljanju javne funkcije.
5. Izabrani zvaničnik, nosilac izvršne funkcije i savjetnik ne smije primiti novac, ček ili drugi vrijednosni papir bez obzira na iznos.
6. U slučaju da sumnja o vrijednosti poklona izabrani zvaničnik, nosilac izvršne funkcije i savjetnik dužan je zatražiti račun od davaoca poklona.
7. Vrijednost poklona je njegova tržišna vrijednost.
8. Primanje poklona prema st. od 1. do 7. ovoga člana odnosi se i na lice koje bi primilo poklon u korist izabranog zvaničnika, nosioca izvršne funkcije i savjetnika, s tim da to lice zna za primanje poklona.

Član 11

Obavljanje drugih poslova zvaničnika

1. Za vrijeme obavljanja javne funkcije izabrani zvaničnici, nosioci izvršne funkcije i savjetnici, ne smiju obavljati dužnost ovlašćenih lica u fondacijama i udruženjima, osnovanim u skladu sa zakonima o udruženjima i fondacijama, a koja se finansiraju iz budžeta bilo kojeg nivoa vlasti, u iznosu većem od 10.000 KM godišnje, odnosno u iznosu većem od 50.000 KM godišnje u fondacijama i udruženjima iz oblasti kulture i sporta. Iznimno od prethodnih odredbi, izabrani zvaničnici, nosioci izvršne funkcije i savjetnici mogu obavljati izvršnu dužnost u fondacijama i udruženjima, koje se ne finansiraju iz budžeta bilo kojeg nivoa vlasti, osnovanim u skladu sa Zakonima o udruženjima i fondacijama.

Drugo poglavlje - Otvorenost

Član 12

Lično finansijsko stanje

Izabrani zvaničnici, nosioci izvršnih funkcija i savjetnici dostavljaju redovne finansijske izvještaje, kako je predviđeno Zakonom i propisima Komisije za odlučivanje o sukobu interesa.

Čl. 13-16

(brisano)

Treće poglavlje - Komisija za odlučivanje o sukobu interesa

Član 17

Sprovođenje

1. Radi sprovođenja ovog zakona osniva se Komisija za odlučivanje o sukobu interesa (u daljem tekstu: Komisija).
2. Komisija ima devet članova od kojih su po tri člana iz Predstavničkog doma i Doma naroda Parlamentarne skupštine BiH, te direktor i dva zamjenika direktora Agencije za prevenciju korupcije i koordinaciju borbe protiv korupcije BiH (u daljem tekstu: Agencija), koji su članovi Komisije po položaju.
3. Članove Komisije imenuju oba doma Parlamentarne skupštine BiH na predlog Zajedničkog kolegijuma oba doma Parlamentarne skupštine BiH.
4. Najmanje jednu trećinu članova Komisije čine poslanici i delegati iz opozicionih stranaka, od čega je najmanje jedan član delegat iz Doma naroda i najmanje jedan član poslanik iz Predstavničkog doma.
5. Direktor i zamjenici direktora su članovi Komisije po položaju, a mandat članova Komisije poslanika i delegata traje koliko i saziv Parlamentarne skupštine BiH koja ih imenuje i vrši se po pravilima koja vrijede za izbor zajedničkih komisija Parlamentarne skupštine BiH. Član Komisije koji je poslanik i delegat može biti ponovo imenovan najviše jednom.
6. Članovi Komisije biraju predsjednika i zamjenika predsjednika. Predsjednik Komisije mora biti poslanik - delegat iz opozicionih stranaka.
7. Komisija za ovjeru svojih odluka i službenih akata u okviru svoje nadležnosti, rada i korespondencije koristi službeni pečat Agencije.
8. Za obavljanje stručnih, administrativnih i tehničkih poslova iz nadležnosti Komisije uspostavlja se Kancelarija Komisije za odlučivanje o sukobu interesa (u daljem tekstu: Kancelarija Komisije) pri Agenciji.
9. Pravilnikom o unutrašnjoj organizaciji Agencije (u daljem tekstu: Pravilnik) uređuju se unutrašnja organizacija i način rada Kancelarije Komisije, radna mjesta i opis poslova, broj državnih službenika i zaposlenika, stručni i drugi uslovi potrebni za raspored na radna mjesta. Na zaposlene u Kancelariji Komisije primjenjuju se propisi koji se odnose na državne službenike i zaposlenike.
10. Ako Komisija raspravlja i odlučuje o sukobu interesa člana Komisije, taj član Komisije nema pravo da učestvuje u raspravi i odlučuje u konkretnom predmetu.
11. Postupak i način odlučivanja u slučaju iz stava 9. ovog člana uređuje Komisija poslovnikom o radu.

Član 17a

Nadležnost Komisije

1. Komisija djeluje na osnovu ovog zakona, dobrih običaja, političke odgovornosti i vjerodostojnosti izabranih zvaničnika, nosilaca izvršne funkcije i savjetnika.
2. Komisija odluke donosi većinom glasova svih članova, koja podrazumijeva glasove najmanje po dva člana iz svakog konstitutivnog naroda.
3. Komisija donosi poslovnik o radu.
4. Komisija, radi primjene odredaba ovog zakona daje mišljenja, donosi uputstva, propisuje obrasce i način vođenja registra. Komisija donosi Pravilnik o načinu vođenja registra, kojim se propisuju pravila o vođenju registra i o obrascima, kao i druga pitanja nužna za funkcionisanje registra, te donosi Pravilnik o postupku kojim se propisuju sprovedbena pravila o vođenju postupka i dostavljanju odluke, te sastavljanju izvještaja.
5. Komisija donosi odluku o tome da li je određeno djelovanje ili propust povreda odredaba ovog zakona. Odluka Komisije mora biti obrazložena.
6. Komisija podnosi izvještaj o radu Parlamentarnoj skupštini BiH jednom godišnje.

Član 18

Postupak pred Komisijom

1. Komisija može pokrenuti postupak iz svoje nadležnosti na osnovu svoje odluke povodom vjerodostojne, osnovane i neanonimne prijave ili po službenoj dužnosti u slučajevima kada raspolaže saznanjima o mogućem sukobu interesa izabranog zvaničnika, nosioca izvršne vlasti ili savjetnika. Komisija donosi pisanu odluku o pokretanju ili nepokretanju postupka. Komisija je dužna da obavijesti podnosioca prijave o svojoj odluci.
2. Komisija obavezno pokreće postupak iz svoje nadležnosti na lični zahtjev izabranog zvaničnika, nosioca izvršne vlasti ili savjetnika.
3. Komisija će o pokretanju postupka iz stava 1. ovog člana obavijestiti izabranog zvaničnika, nosioca izvršne vlasti ili savjetnika te obavezno zatražiti njegovo izjašnjenje o navodima prijave koje je izabrani zvaničnik, nosilac izvršne vlasti ili savjetnik dužan dostaviti Komisiji u roku od 15 dana od dana prijema pisanog zahtjeva.
4. Podnosiocu prijave iz stava 1. ovog člana garantuje se zaštita anonimnosti.
5. Komisija ima pravo da utvrdi činjenice sopstvenom istragom ili da pribavi činjenice i dokaze posredstvom drugih organa vlasti. Svi organi vlasti, institucije i sudovi na svim nivoima vlasti u BiH obavezni su Komisiji pružiti zatraženu pravnu pomoć i sve druge vidove pomoći.
6. Komisija će u slučaju sumnje o postojanju kršenja odredaba ovog zakona obavijestiti osobu za koju postoji osnovana sumnja da je prekršila ovaj zakon, tražeći od nje izjavu o navodima sadržanim u prijavi.
7. Izabranom funkcioneru, nosiocu izvršne vlasti ili savjetniku i drugim učesnicima u postupku utvrđivanja činjenica i dokaza mora se omogućiti zaštita integriteta ličnosti, o čemu brine Komisija.
8. Ako postoji sumnja u vezi sa mogućim kršenjem ovog zakona, Komisija će dati svoje mišljenje na zahtjev svake osobe ili institucije koja to od nje zatraži.
9. Izuzev slučajeva kada je Zakonom drugačije propisano, postupak pred Komisijom, osim postupka glasanja, otvoren je za javnost. Nakon sprovedenog postupka, Komisija je dužna da donese konačnu odluku najkasnije u roku od 15 dana od dana okončanja postupka prikupljanja činjenica i izvođenja dokaza i da je javno objavi.
10. Odluke Komisije moraju biti obrazložene i objavljuju se na njenoj internet stranici.

Član 19

Upravni spor

Protiv odluke kojom se izabranom zvaničniku, nosiocu izvršne funkcije ili savjetniku izriče sankcija iz člana 20. stav 1. ovog zakona nije dopuštena žalba, ali se može pokrenuti upravni spor pred Sudom Bosne i Hercegovine.

Član 20

Sankcije

1. Sankcije koje Komisija može izreći izabranom zvaničniku, nosiocu izvršne funkcije ili savjetniku su: obustava isplate dijela neto mjesečne plate, predlog za razrješenje sa dužnosti i poziv za podnošenje ostavke.
2. Ako se utvrdi da izabrani zvaničnik, nosilac izvršne funkcije ili savjetnik povređuje odredbe čl. 4, 7, 8, 9, 10. i 11. ovog zakona, Komisija izriče sankciju obustave isplate do 50% neto mjesečne plate vodeći računa o težini i posljedicama povrede Zakona.
3. Ako se utvrdi da izabrani zvaničnik, nosilac izvršne funkcije ili savjetnik povređuje odredbe čl. 5, 6. i 8a. ovog zakona, Komisija izriče sankciju obustave isplate do 30% neto mjesečne plate vodeći računa o težini i posljedicama povrede Zakona.
4. Sankcija obustave isplate dijela neto mjesečne plate izabranog zvaničnika, nosioca izvršne funkcije ili savjetnika ne može trajati duže od dvanaest mjeseci, a iznos obuhvaćen obustavom ne smije prelaziti jednu polovinu neto mjesečne plate izabranog zvaničnika, nosioca izvršne funkcije ili savjetnika.
5. Izuzetno od odredaba stava 4. ovog člana, obustava isplate dijela neto mjesečne plate izabranog zvaničnika, nosioca izvršne funkcije ili savjetnika može trajati duže od dvanaest mjeseci sve do razrješenja sa dužnosti, odnosno podnošenja ostavke ili otklanjanja razloga koji su ga doveli do sukoba interesa u skladu sa članom 20a. stav 4. ovog zakona.
6. Odluka o sankciji dostavlja se lično izabranom zvaničniku, nosiocu izvršne funkcije ili savjetniku. Izvršnu odluku Komisija dostavlja radi izvršenja službi koja obračunava platu izabranom zvaničniku, nosiocu izvršne funkcije ili savjetniku.
7. Izabrani zvaničnik, nosilac izvršne funkcije ili savjetnik obavezan je vratiti poklon ili novac koji je ekvivalentan vrijednosti poklona i dobiti ostvarene od naknada za obavljanje javne funkcije zbog koje je bio u sukobu interesa, o čemu Komisija donosi zaključak.
8. Ako je primjereno prirodi povrede, Komisija može tokom trajanja postupka naložiti izabranom zvaničniku, nosiocu izvršne funkcije ili savjetniku da otkloni uzroke postojanja sukoba interesa u određenom roku te, ako izabrani

zvaničnik, nosilac izvršne funkcije ili savjetnik to učini, može obustaviti postupak ili ga dovršiti i ispunjenje naloga uzeti u obzir prilikom izricanja sankcije.

9. Nakon što izrekne sankciju, Komisija daje rok od 30 dana da imenovani zvaničnik, nosilac izvršne funkcije ili savjetnik otkloni razloge koji su ga doveli do sukoba interesa.

Član 20a

Predlog za razrješenje i poziv izabranom zvaničniku, nosiocu izvršne funkcije ili savjetniku za podnošenje ostavke

1. U slučaju da i nakon isteka roka iz člana 20. stav 9. ovog zakona izabrani zvaničnik, nosilac izvršne funkcije ili savjetnik ne otkloni razloge koji su ga doveli do sukoba interesa, Komisija bez odgađanja dostavlja obrazloženi predlog za razrješenje izabranog zvaničnika, nosioca izvršne funkcije ili savjetnika nadležnom organu vlasti koji je izvršio imenovanje ili poziva izabranog zvaničnika, nosioca izvršne funkcije ili savjetnika na podnošenje ostavke.
2. Ako je izabrani zvaničnik, nosilac izvršne funkcije ili savjetnik razriješen javne dužnosti u skladu sa stavom 1. ovog člana, organ vlasti koji je razriješio zvaničnika o tome će obavijestiti Komisiju.
3. U slučaju neprihvatanja predloga Komisije za razrješenje izabranog zvaničnika, nosioca izvršne funkcije ili savjetnika, organ vlasti, nadležan za imenovanje, dužan je iznijeti razloge odbijanja predloga.
4. Ako izabrani zvaničnik, nosilac izvršne funkcije ili savjetnik ne bude razriješen dužnosti, odnosno ne podnese ostavku suprotno odredbama čl. 20. i 20a. ovog zakona ili ne otkloni razloge koji su ga doveli do sukoba interesa, Komisija će izricati nove sankcije obustave isplate dijela neto mjesečne plate u skladu sa ovim zakonom do otklanjanja razloga, odnosno napuštanja funkcije.
5. U slučaju kada Komisija pozove na podnošenje ostavke izabranog zvaničnika, nosioca izvršne funkcije ili savjetnika na obavljanje javne dužnosti, poziv se objavljuje u "Službenom glasniku BiH", dnevnim novinama koje se distribuiraju na teritoriji cijele Bosne i Hercegovine i na internet stranici Komisije.
6. Novčane kazne iz čl. 20. i 20a. ovog zakona uplaćuju se u budžet institucija Bosne i Hercegovine i međunarodnih obaveza Bosne i Hercegovine.

Član 21

Zastarjevanje

Postupak za primjenu sankcija u vezi s kršenjem ovog zakona mora se pokrenuti u roku od četiri godine od navodnog kršenja Zakona.

Četvrto poglavlje - Obim Zakona

Član 22

Primjena Zakona na entitete i Brčko Distrikt

1. Entiteti i Brčko Distrikt donijeće svoje zakone u roku od 60 dana od dana stupanja na snagu ovog zakona.
2. Do donošenja zakona u oblasti sukoba interesa na entitetskom nivou i nivou Brčko Distrikta, entiteti i Brčko Distrikt primjenjivaće odredbe utvrđene u ovom zakonu.
3. Odredbe zakona iz stava 1. ovog člana ne smiju biti u suprotnosti sa ovim zakonom.

Peto poglavlje - Prelazne i završne odredbe

Član 23

Stupanje na snagu

1. Zakon stupa na snagu narednog dana od dana objavljivanja rezultata Izbora koji će se održati u oktobru 2002. godine.
2. Zakon će biti objavljen u "Službenom glasniku BiH", službenim glasilima entiteta i Brčko Distrikta Bosne i Hercegovine.

Samostalni član Zakona o izmjenama i dopunama Zakona o sukobu interesa u institucijama vlasti Bosne i Hercegovine

("Sl. glasnik BiH", br. 12/2004)

Član 7

Ovaj Zakon stupa na snagu 8. dana od dana objavljivanja u "Službenom glasniku BiH".

**Samostalni članovi Zakona o izmjenama i dopunama
Zakona o sukobu interesa u institucijama vlasti Bosne i Hercegovine**

("Sl. glasnik BiH", br. 87/2013)

Član 9

Prelazne odredbe

Svi postupci pokrenuti do dana stupanja na snagu ovog zakona biće okončani prema odredbama koje su važile do dana stupanja na snagu ovog zakona, ako je to povoljnije za stranku u postupku.

1. U roku 30 dana od dana stupanja na snagu ovog zakona, Parlamentarna skupština BiH će pokrenuti postupak imenovanja članova Komisije.
2. Komisija će u roku 15 dana od dana imenovanja članova Komisije donijeti poslovnik o radu.
3. Komisija će u roku 30 dana od dana imenovanja članova Komisije donijeti akte iz člana 17a. stav 4. ovog zakona.
4. Agencija će u roku 60 dana od dana stupanja na snagu ovog zakona izmijeniti Pravilnik.
5. Centralna izborna komisija Bosne i Hercegovine će u roku 15 dana od dana imenovanja članova Komisije izvršiti predaju svih predmeta iz oblasti sukoba interesa kao i sve neophodne evidencije i drugo što je potrebno za rad Komisije.
6. Agencija će preuzeti zaposlene iz Centralne izborne komisije Bosne i Hercegovine koji su do stupanja na snagu ovog zakona obavljali poslove koji su stavljeni u nadležnost Komisije i rasporediti ih u skladu sa Pravilnikom.
7. Centralna izborna komisija Bosne i Hercegovine i Agencija će u roku 60 dana od dana stupanja na snagu ovog zakona zaključiti sporazum o preuzimanju zaposlenih, u kojem će detaljno urediti sve aspekte preuzimanja zaposlenih.

Član 10

Prestanak važenja

Danom stupanja na snagu ovog zakona prestaju da važe Pravila o vođenju postupka iz oblasti Zakona o sukobu interesa ("Službeni glasnik BiH", broj 65/09) i Pravilnik o načinu vođenja registra - prečišćeni tekst ("Službeni glasnik BiH", broj 70/11).

Član 11

Stupanje na snagu

Ovaj zakon stupa na snagu osmog dana od dana objavljivanja u "Službenom glasniku BiH".